

UCAPAN PERDANA MENTERI SEMASA MEMBENTANGKAN USUL UCAPAN TAKZIAH DI ATAS KEMANGKATAN DULI YANG MAHA MULIA SERI PADUKA BAGINDA TUANKU YAHYA PETRA IBNI AL-MARHUM SULTAN IBRAHIM, YANG DI-PERTUAN AGONG DI DEWAN RAKYAT PADA 3 APRIL, 1979.

Tuan Yang Di-Pertua,

Saya mohon izin membentangkan satu usul yang berbunyi:-
Bahawa Dewan ini merakamkan perasaan sedih dan dukacita yang amat sangat di atas kemangkatan Duli Yang Maha Mulia Seri Paduka Baginda Yang Di-Pertuan Agong Yang Ke Enam, Tuanku Yahya Petra Ibni Almarhum Sultan Ibrahim; menyembahkan perutusan takziah ke bawah Duli Yang Maha Mulia Seri Paduka Baginda Raja Permaisuri Agong, Tuanku Zainab binti Tengku Mohamed Petra, dan kepada Duli Yang Maha Mulia Sultan Kelantan, Tengku Ismail Petra Ibni Almarhum Sultan Yahya Petra serta kepada Kerabat Di Raja Kelantan, diiringi dengan doa semoga Duli Duli Yang Maha Mulia Baginda itu dikurniakan berbanyak sabar di atas kemangkatan mengejut Seri Paduka Baginda Yang Di-Pertuan Agong itu; merafakkan sembah menjunjung kasih serta penghargaan dan pujian ke bawah Duli Yang Maha Mulia Tuanku Zainab di atas segala jasa dan khidmat Baginda sebagai Raja Permaisuri Agong.

Tuan Yang Di-Pertua,

“Tiap-tiap yang bernyawa akan menemui mati.” “Kullu nafs in za-ikatul maut” (Surah Al-Imran; ayat 185). Allah juga berfirman yang bermaksud:- “Di mana saja kamu berada, nescaya kematian akan mendapatkan kamu, biarpun kamu dalam benteng yang teguh.” (Surah Annisaak; ayat 78). Sesungguhnya sebagai makhluk Tuhan, kita wajib menerima hakikat ini. Walau bagaimanapun, kita merasa amat sedih dan pilu kerana dengan secara tiba-tiba, negara dan rakyat Malaysia telah kehilangan seorang Raja yang berpengalaman luas dan berhemah tinggi. Kemangkatan Duli Yang Maha Mulia Seri Paduka Baginda Tuanku Yahya Petra Ibni Almarhum Sultan Ibrahim, Yang Di-Pertuan Agong yang kita kasihan pada hari Khamis, 29 Mac yang lalu, telah mengejutkan seluruh negara.

Tuan Yang Di-Pertua,

Sebenarnya, pada petang hari itu, saya telah diberitahu bahawa Almarhum telah jatuh gering disebabkan penyakit lemah jantung. Saya telah pergi ke Istana Negara. Rawatan pakar yang rapi telah dijalankan serta-merta, tetapi dengan kehendak Tuhan Yang Maha Berkuasa, Baginda Tuanku telah mangkat. Innalillahi Wa-inna-ilaihi Raajiuun.

Saya sendiri berasa amat terkejut dan terharu sekali dengan kemangkatan Almarhum, oleh kerana pada pagi hari Rabu 28 Mac, sebagaimana biasa, saya telah mengadap Baginda. Pada ketika itu, Almarhum berada di dalam kandungan sihat walafiat dan riang gembira. Inilah saat-saat terakhir saya bersama dengan Baginda di mana saya telah diterima mengadap hampir satu jam iaitu lebih dari jangka masa yang biasa dijadualkan.

Memanglah menjadi kebiasaan bagi saya mengadap Baginda pada tiap-tiap hari Rabu, sebelum mesyuarat mingguan Jemaah Menteri. Tetapi pada hari tersebut baginda telah mengambil masa yang panjang sedikit kerana sebagaimana biasa Baginda telah bertanyakan hal dalam beberapa perkara. Sebagaimana biasa juga perbualan kami adalah dalam suasana penuh mesra dan berterus terang. Minat yang ditunjukkan oleh Baginda benar-benar melahirkan bahawa Baginda adalah Raja yang berjiwa rakyat, sentiasa mengambil berat di atas kepentingan dan kebajikan rakyat, lebih-lebih lagi rakyat yang miskin dan daif yang tinggal di kawasan-kawasan yang kurang maju.

Pada tiap-tiap kali saya mengadap perbualan Baginda sentiasa berkisar mengenai kemajuan pembangunan untuk rakyat. Sebagai Raja bagi Negeri Kelantan, perhatian berat Baginda sentiasa tertumpu kepada negeri Baginda yang telah tertinggal dalam bidang pembangunan di masa-masa yang telah lalu. Sesungguhnya, rakyat Negeri Kelantan khususnya, telah kehilangan seorang Raja yang payah untuk diganti. Jasa bakti Baginda semasa menduduki takhta Kerajaan Negeri Kelantan dan Kerajaan Persekutuan sukar ditandingi. Kita tidak akan dapat membalas kesemuanya ini, tetapi Almarhum akan tetap tinggal di dalam kenangan setiap rakyat.

Tuan Yang Di-Pertua,

Memanglah tepat maksud pepatah Melayu, bahawa harimau mati meninggalkan belang, manusia mati meninggalkan nama. Sebagaimana saya telah katakan bahawa semasa hayatnya, Almarhum sentiasa mengambil berat dan suka mengambil tahu hal-ehwal mengenai negara, terutama perkara-perkara yang melibatkan kepentingan dan kebajikan

rakyat. Hasrat ini sentiasa dilahirkan oleh Almarhum pada tiap-tiap minggu atau bila-bila masa saya mengadap. Saya percaya Ahli-Ahli Yang Berhormat sekalian, bahkan seluruh negara mengetahui minat yang kuat yang ditunjukkan oleh Almarhum dalam menjalankan tugas-tugas negara. Walaupun usia Almarhum telah lanjut dan tugas-tugas Yang Di-Pertuan Agong itu berat, Almarhum sentiasa cuba dengan sedaya upaya menunaikan kewajipan Baginda.

Sebagai Ketua Negara berperlembagaan, Almarhum telah mengambil bahagian hampir dalam semua perayaan-perayaan Kebangsaan dan Istiadat istiadat Negara. Dalam Perayaan Hari Kebangsaan misalnya, Almarhum telah berdiri berjam-jam lamanya untuk menerima tabik hormat serta menyaksikan kegiatan-kegiatan yang dipersembahkan oleh rakyat berbilang kaum. Begitulah juga halnya dalam perayaan Maulud Nabi Salallahu Alaihi Wasallam di mana Almarhum telah turut bersamasama dengan umat Islam yang lain berarak dari Stadium Merdeka ke Masjid Negara. Kepada saya, kesemuanya itu adalah satu contoh teladan yang amat mulia yang telah dilakukan oleh seorang Raja. Perbuatan Almarhum itu telah meningkatkan lagi semangat dan kecenderungan rakyat terhadap mengukuhkan lagi perpaduan negara dan meninggikan lagi syiar Islam. Minat dan penyertaan Almarhum dalam kegiatan-kegiatan yang dianjurkan oleh rakyat telah menyubur dan mengembangkan semangat kasih sayang rakyat terhadap Baginda. Ini jelas kelihatan semasa lawatan rasmi Baginda ke negeri-negeri di mana sambutan yang begitu meriah dan mesra diberikan oleh rakyat dari segenap lapisan.

Tuan Yang Di-Pertua,

Almarhum Tuanku Yahya Petra adalah seorang Raja yang amat bertimbang rasa. Baginda sentiasa sedar terhadap kewajipan dan tanggungjawabnya, tanggungjawab dan tugas Menteri-Menteri dan Pegawai-pegawai Kerajaan dan dengan sedaya upaya Baginda sentiasa membantu bagi meringankan beban dan tanggungjawab kita semua. Dalam menjalankan tugas dan tanggungjawab sebagai Yang Di-Pertuan Agong, Almarhum sentiasa sedar dan faham di atas peranannya sebagai seorang Ketua Negara berperlembagaan. Baginda juga sentiasa sedar dan faham di atas segala undang-undang dan peraturan serta sentiasa berpandu dan berpegang teguh kepada Perlembagaan.

Sejak Baginda dilantik sebagai Yang Di-Pertuan Agong Yang Ke Enam, tiga tahun setengah yang lalu iaitu pada 21 September, 1975, Malaysia dan rakyatnya telah mencapai kemajuan dalam berbagai bidang. Dengan berkat pemerintahan Baginda, Malaysia telah menik-

mati kemajuan sosio-ekonomi, sekalipun pertumbuhan ekonomi dunia telah lembab. Perpaduan dan persefahaman di kalangan rakyat berbilang kaum, telah dapat diertakan lagi sementara keselamatan negara telah dapat dikawal dan dipelihara. Kegiatan-kegiatan dalam bidang rohaniah telah juga dipesatkan dan ini telah membawa kesan yang bermanfaat kepada seluruh rakyat. Dengan berkat daulat Almarhum, imej Malaysia di luar negeri telah meningkat dan negara kita telah menjadi lebih terkenal di kalangan antarabangsa.

Tuan Yang Di-Pertua,

Di sepanjang masa pemerintahan Baginda yang adil dan bijaksana, Almarhum telah melakukan lawatan rasmi hampir keseluruhan negara serta beramah mesra dengan rakyat di semua peringkat dan lapisan. Sifat-sifat peramah, pengasih dan pemurah dari Almarhum itu telah menawan hati rakyat jelata dan menambahkan lagi kesayangan dan semangat taat setia mereka kepada Baginda dan negara. Mengingati dan mengenangkan sifat-sifat mulia inilah maka seluruh negara merasa amat terharu dan amat sedih serta terkejut apabila mengetahui kemangkatan Baginda itu.

Tuan Yang Di-Pertua,

Tidak ada kata-kata pujian yang lebih tinggi yang dapat saya lafazkan bagi menilaikan serta memberi penghargaan di atas jasa-jasa dan khidmat bakti yang telah dikurniakan oleh Baginda kepada negara. Setiap rakyat tidak akan lupa di atas jasa dan khidmat bakti Almarhum itu. Marilah kita bersama-sama berdoa semoga Allah Subhanahu Wataala mencucuri rahmat ke atas roh Almarhum itu, dan supaya ditempatkan Baginda di kalangan para salihin dan muttaqin.

Tuan Yang Di-Pertua,

Akhirnya, saya dengan hormatnya mempersilakan semua Ahli Yang Berhormat berdiri bertafakkur selama satu minit. Mereka yang beragama Islam, sama-samalah kita bersedekah Al-Fatihah dan bagi yang lain-lain, bolehlah melafazkan doa mengikut cara ugama masing-masing.

Tuan Yang Di-Pertua,

Demikianlah saya mohon mencadangkan usul ini, terima kasih.